



Na osnovu člana 7. Zakona o budžetima Federacije Bosne i Hercegovine ("Službene novine Federacije BiH", broj: 102/13, 9/14, 13/14, 8/ 15, 91/15), člana 7. i člana 13. Zakona o principima lokalne samouprave u FBiH (Službene novine FBiH broj 49/06 , 51/00) i člana 24. tačka 3. Statuta općine Trnovo („Službene novine Kantona Sarajevo,„ br.12/08), Općinsko vijeće Trnovo na prijedlog Općinskog načelnika, na 4. sjednici održanoj 13.02.2017. godine , donijelo je :

ODLUKU O IZVRŠAVANJU BUDŽETA OPĆINE TRNOVO ZA 2017.god.

I OPĆE ODREDBE

Član 1.

Ovom Odlukom uređuje se struktura prihoda i primitaka te rashoda i izdataka, izvršavanje, prioriteta plaćanja, upravljanje finansijskom i nefinansijskom imovinom, prava i obaveze korisnika budžetskih sredstava, kaznene odredbe (u daljem tekstu :korisnici) i ovlaštenja općinskog načelnika u izvršavanju Budžeta Općine Trnovo za 2017.godinu, te druga pitanja izvršavanja Budžeta (u daljem tekstu: Budžet)

Član 2.

Budžet je akt koji donosi Općinsko vijeće, a kojim se utvrđuje plan finansijskih aktivnosti Općine Trnovo (u daljem tekstu: Općina) iskazanih kroz projekciju godišnjih prihoda, primitaka i finansiranja, utvrđenih rashoda , izdataka i finansiranja Općine te kroz projekte raspoređene u tekuće i kapitalne programe.

Član 3.

- (1) Budžet se sastoji od općeg i posebnog dijela.
- (2) Opći dio Budžeta čini Račun prihoda i rashoda , račun finansiranja viška prihoda nad rashodima, odnosno viška rashoda nad приходima iz Budžeta općine Trnovo.
- (3) Posebni dio budžeta sastoji se od plana rashoda i izdataka budžetskih korisnika raspoređenih u tekuće i razvojne programe za 2017.godinu.
- (4) Račun prihoda i rashoda budžeta Općine Trnovo sastoji se od:

a. PRIHODA

- poreza koji su utvrđeni zakonom,
- neporeznih prihoda kao što su prihodi poduzetništva i imovine,
- prihoda ostvarenih obavljanjem osnovne djelatnosti i ostalih poslova budžetskih korisnika.

b. RASHODA

- za zaposlene, kao što su tekući izdaci za plaće, naknade, izdaci za materijal i usluge,
- tekući transferi i plaćanja kamata,
- za subvencije, pomoći i naknade,
- kapitalni transferi,
- razvojni programi za tekuću budžetsku godinu i naredne dvije godine

- (5) U računu finansiranja iskazuju se primitci od finansijske i nefinansijske imovine, inozemnih i domaćih podrški (grantovi), te izdaci za finansijsku i nefinansijsku imovinu.

II IZVRŠAVANJE BUDŽETA

Član 4.

- (1) Budžetom se osiguravaju sredstva budžetskim korisnicima koji su u posebnom dijelu Budžeta utvrđeni kao nosioci sredstava.
- (2) Budžet izvršava Općinski načelnik u skladu sa važećim zakonskim propisima i ovom Odlukom.
- (3) Korisnici mogu koristiti sredstva Budžeta samo za namjene koje su određene Budžetom i to do visine utvrđene u posebnom dijelu Budžeta.
- (4) Korisnici transfera Budžeta obavezni su u roku od mjesec dana po utrošku sredstava dostaviti nadležnoj službi Izvještaj sa dokumentacijom o namjenskom utrošku sredstava , a za sredstva koja nisu utrošena ili su djelimično utrošena u budžetskoj godini dostaviti Izvještaj sa 31.12.2017.godine , najkasnije do 15.01.2018.godine.
- (5) Uslov za isplatu korisnicima iz stava (3) ovog člana, jeste pravdanje utroška budžetskih sredstava iz predhodne godine.
- (6) Korisnicima sredstava koji ne postupe u skladu sa odredbama stava (4) i (5) ovog člana neće se ddjeljivati budžetska sredstva u narednom periodu dok ne opravdaju ranije transferisana sredstva u utvrđenom roku ili ne izvrše povrat istih o čemu se pokreće poseban postupak.

Član 5.

- (1) Budžet može primati namjenske primitke i grantove koji se realizuju po namjeni davaoca primitka-granta,a nisu planirani Budžetom (namjenski grantovi Kantona i drugih nivoa vlasti, donacije i dr.)
- (2) Za grantove koji nisu planirani u Budžetu za 2017. godinu , a ostvare se u toku godine-ovlašćuje se Općinski načelnik da iste koristi u skladu sa utvrđenom namjenom.
- (3) Općinsko vijeće ovlašćuje Općinskog načelnika da troši sredstva namjenski unešena u Budžet općine Trnovo za 2017.godinu, a kao takva u Budžet se unose posebnom Odlukom općinskog vijeća i na osnovu predhodno sklopljenih ugovora. Planiranje ovih sredstava se vrši na prihodovnoj strani budžeta i njihovo trošenje je isključivo za namjene sklopljene u ugovoru.
- (4) U sklopu Budžeta Općine Trnovo, a u cilju redovnog praćenja naplate i usmjeravanja sredstava naknade za pogodnost građevinskog zemljišta pratit će se i realizacija Programa naplate i usmjeravanja naknade za pogodnost građevinskog zemljišta .
- (5) Navedena sredstva čine Fond prostornog uređenja.

Član 6.

- (1) Raspolaganje sredstvima utvrđenim u posebnom dijelu Budžeta vrši se u skladu sa dinamikom priliva sredstava.
- (2) Općinski Načelnik je dužan prilikom realizacije voditi računa o utvrđenoj dinamici priliva i odliva sredstava i uskladiti plaćanje sa planovima izvršenja Budžeta.
- (3) Izuzetno usljed neusklađenosti priliva sredstava, Općinski načelnik može izmijeniti dinamiku i donositi mjere u cilju privremenog smanjenja visine planiranih izdataka korisnika za pojedine namjene, poštujući pri tome osnovni princip Budžeta – pokrivenost rashoda prihodima.
- (4) Budžetskim korisnicima nije dozvoljeno stvaranje obaveza ili opterećenja budžetskih pozicija ako ti rashodi ili opterećenja budžetskih pozicija nisu odobreni u okviru iznosa alociranog za tog budžetskog korisnika.

Član 7.

- (1) Ako se tokom godine zbog izvanrednih prilika i potreba povećaju izdaci ,odnosno smanje prihodi i primici budžeta,Općinski načelnik predlaže Općinskom vijeću izmjene

i dopune Budžeta općine Trnovo. Pored toga ako prihodi porastu mogu se vršiti izmjene i dopune Budžeta .

- (2) Svaka izmjena i dopuna Budžeta vrši se po istom postupku koji se primjenjuje kod usvajanja budžeta.

Član 8.

- (1) Općinski načelnik na prijedlog budžetskog korisnika, može donijeti Odluku o prestruktuiranju rashoda u okviru ukupnog iznosa odobrenog za budžetskog korisnika, najviše do 10% ukupno odobrenih rashoda za budžetskog korisnika.
- (2) Obim i vrstu rashoda za prestruktuiranje, Općinski načelnik utvrđuje posebnom Odlukom i o tome informiše Općinsko vijeće.
- (3) U okviru odobrenog budžeta , preraspodjela je iznimno dozvoljena između budžetskih korisnika. Rješenje o preraspodjeli sredstava između budžetskih korisnika donosi Općinski načelnik na prijedlog Službe za finansije.

Član 9.

- (1) Postupak nabavke roba, usluga i ustupanja radova mora se obavljati u skladu sa Zakonom o javnim nabavkama Bosne i Hercegovine («Službeni glasnik Bosne i Hercegovine», br.39/14) .
- (2) Komisiju za nabavke,u skladu sa Zakonom iz predhodnog stava, formirat će Općinski načelnik.
- (3) Uspostavljanje i rad komisije za nabavke regulisat će se Pravilnikom o nabavci roba, vršenju usluga i ustupanju radova, kojeg donosi Općinski načelnik. U skladu sa Pravilnikom Komisija za javne nabavke dužna je donijeti plan nabavki za fiskalnu godinu.

Član 10.

- (1) Služba za upravu nadležna za finansije dužna je podnositi Općinskom načelniku mjesečne izvještaje u roku najviše 30 dana, a tromjesečne i polugodišnje finansijske izvještaje u roku od najviše 60 dana, od završetka svakog izvještajnog razdoblja.
- (2) Općinsko vijeće razmatra godišnji izvještaj o izvršenju Budžeta kao i polugodišnji izvještaj, ako je to utvrđeno Programom rada Općinskog vijeća .
- (3) Izvještaj o izvršenju Budžeta za svako tromjesečje fiskalne godine dostavlja se Ministarstvu finansija Kantona Sarajevo u roku od 30 dana po završetku obračunskog perioda.
- (4) Izvještaj o izvršenju Budžeta za predhodnu fiskalnu godinu Obavezno se podnosi Općinskom vijeću na usvajanje.

Član 11.

Način izvršavanja budžeta po ekonomskom kodu:

(1) 610000 Bruto plaće i naknade zaposlenih

Navedena sredstva koristit će se u skladu sa Odlukom o utvrđivanju plaća i naknada izabranih zvaničnika,nosilaca izvršnih funkcija i savjetnika u općini Trnovo ,Odlukom o naknadama i dodatcima na plaću državnih službenika i namještenika o Jedinstvenom Općinskom organu uprave i posebnim stručnim službama OpćineTrnovo („Službene Novine Kantona Sarajevo“ broj : 7/13) Odlukom o plaćama i naknadama nosilaca izvršnih funkcija, savjetnika , državnih službenika i namještenika u Jedinstvenom Općinskom organu uprave i posebnim stručnim službama Općine Trnovo („Službene Novine Kantona Sarajevo“ broj : 22/12), Pravilnikom o unutrašnjoj organizaciji jedinstvenog općinskog organa uprave i službi za upravu Općine Trnovo, kao i Zakona o plaćama i naknadama u organima vlasti Kantona Sarajevo (Službene Novine Kantona Sarajevo br.33/11),te internih akata Općine.

(2) 613000 Izdaci za materijal i usluge

Raspoređuje Općinski načelnik shodno planu i namjeni sredstava.

(3) 614000 Tekući grantovi

- a. **Grantovi humanitarnim organizacijama** – Ukupno planirana sredstva za humanitarne organizacije u toku 2017.godine je 21.000,00 KM i isplaćivat će se mjesečno u visini od 1/12 planiranih sredstava.
- b. **Političke partije** - Raspodjela i korištenje sredstava u iznosu od 40 000.00 KM vršit će se u skladu sa članom 7. Zakona o finansiranju političkih partija («Službeni glasnik BiH», br.95/12).
- c. **Udruženja:** Raspodjelu ukupno planiranih sredstava za Udruženja građana boračkih i dr.organizacija koristit će se mjesečno u visini od 1/12 planiranih sredstava. Sredstva planirana za pomoć udruženjima koristit će se za održavanje godišnjih skupština udruženja ,pomoći članovima udruženja i dr. aktivnosti u skladu sa Programima i zahtjevima o finansiranju aktivnosti.
- d. **Izdatke za obilježavanje historijskih ličnosti i događaja** 20.000,00 KM– Korištenje sredstava vršiće se u skladu sa Programom obilježavanja, a raspoređivaće se prema programu aktivnosti i finansijskom planu utvrđenim od strane organizacijskog tijela;
- e. **Izdatke za sport** finansirat će se Sportski klubovi i sportske manifestacije na području općine Trnovo, dodjela sredstava vršit će se na osnovu posebno izrađenog Programa i plana o finansiranju kulturnih manifestacija i sportskih takmičenja .
- f. **Izdaci za kulturu** koristit će se za kulturne manifestacije društava u skladu sa Programom i planom o finansiranju kulturnih manifestacija i sportskih takmičenja a prema Programu nadležne službe.
- g. **Sredstva iz Fonda za mlade** na zahtjev zainteresovanih subjekata u skladu sa objavljenim javnim pozivom na web stranici općine Trnovo.
- h. **Sredstva iz fonda za pravnu i socijalnu pomoć** mogu koristiti boračka udruženja za potrebe pružanja pravne i socijalne pomoći, po osnovu zahtjeva istih, a na osnovu zaključka općinskog načelnika.
- (4) **Sredstva iz fonda za opremanje školaraca-** sredstva namjenjena za kupovinu školskog pribora najugroženijoj kategoriji učenika (evidencija od strane nadležene općinske službe), nabavka pribora vrši se u skladu sa Zakonom o javnim nabavkama («Službeni glasnik Bosne i Hercegovine», br.39/14) .
- i. **Sredstva iz fonda za novovjenčane parove** – sredstva u iznosu od 10.000,00 KM za sve parove koji imaju prebivalište na općini Trnovo ,koji sklope brak i ispune uslove za dodjelu ovih sredstava. Sredstva će se dodjeliti u skladu sa zaključkom općinskog načelnika. Visinu sredstava po pojedinačnom zahtjevu ne može biti veća od 500,00 KM.
- j. **Stipendije učenika i studenata** isplaćuju se mjesečno na osnovu potpisanog ugovora, po predhodno provedenom konkursu u skladu sa Pravilnikom i Odlukom Općinskog vijeća iz planiranog fonda za stipendije (35.000,00KM)
- k. **Novčana pomoć za socijalnu i zdravstvenu zaštitu** koristit će se na osnovu donesenog Zaključka Općinskog načelnika putem službe nadležne za navedene poslove, po svakom pojedinačnom zahtjevu najviše do 250,00 KM.Dodjela ovih sredstava vršit će se na osnovu Pravilnika o načinu i postupku odobravanja jednokratne novčane pomoći iz budžeta Općine Trnovo.
- l. Po zahtjevima za teža oboljenja građana i dr. slične situacije mogu se koristiti sredstva u većim iznosima, a maksimalno 500,00 KM s tim da uz zahtjeve postoji potrebna zdravstvena dokumentacija o vrsti oboljenja i visini sredstava potrebnih za liječenje .) Isplata ovih sredstava će biti iz posebno oformljenog fonda za **pomoć pri liječenju socijalnih kategorija**. Dodjela ovih sredstava vršit će se na osnovu Pravilnika o načinu i postupku odobravanja jednokratne novčane pomoći iz budžeta Općine Trnovo.
- m. Budžetom za 2017.godinu će se donijeti zaključak za pomoć **porodiljama** sa područja Općine Trnovo za svako upisano novorođeno dijete sa po 50,00 KM mjesečno.Dodjela sredstava sa ove stavke vršit će se na osnovu zaključka općinskog načelnika .
- n. Također,Budžetom za 2017.godinu će se napraviti poseban pravilnik,odnosno postaviti kriteriji na osnovu kojih će se pomoći posebnoj kategoriji stanovništva (**ženama koje nemaju nikakvih primanja**) kojima će se isplaćivati simbolična pomoć od 50,00 KM mjesečno. Sredstva će se dodjeliti osobama iz evidencije svih mjesnih zajednica općine Trnovo .
- o. **Izdaci za socijalnu i zdravstvenu zaštitu-pomoć kod smrtnog slučaja užeg člana porodice** – socijalnim kategorijama stanovništva koje zadesi smrtni slučaj užeg člana porodice na osnovu dostavljenog zahtjeva snosit će se troškovi ukopa po stvarnim

troškovima uz adekvatno dostavljenu dokumentaciju u skladu sa raspoloživim sredstvima u budžetu.

Sredstva trasfera pojedincima za koje su Budžetom utvrđeni krajnji korisnici, realizuju se na osnovu potpisanog protokola ili ugovora putem nadležne službe.

Sredstva trasfera udruženjima i drugim neprofitnim organizacijama za koje su Budžetom ili **Odlukom vijeća** utvrđeni krajnji korisnici, realizuju se na osnovu potpisanog protokola ili ugovora putem nadležne službe.

- **Subvencije privrednim subjektima:**

Sredstva planirana za razvoj privrede u iznosu od 100.000,00 KM koristit će se po oglašavanju u skladu sa Javnim pozivom, koji će raspisati Općinski načelnik na prijedlog nadležne službe, s tim da se općinskom načelniku ostavlja rezerva u iznosu od 10% za potrebe hitnog intervenisanja u oblasti nastanka šteta u poljoprivredi .

- **Kapitalna ulaganja :**

- a. 821000 Nabavka opreme**

Ovlašćuje se Općinski načelnik da vrši nabavku opreme za potrebe organa u visini odobrenih sredstava u posebnom dijelu Budžeta.

Nabavku Općinski načelnik odobrava Zaključkom o nabavci.

- b. 821000-Korištenje sredstava za izgradnju skloništa**

Sredstva za izgradnju skloništa koristit će se za namjene utvrđene, Zakonom o zaštiti spašavanja ljudi i materijalnih dobara od prirodnih i drugih nesreća.

- **Kapitalni grantovi:**

- a. **615-** Korištenje sredstava kapitalnih grantova pojedincima i neprofitnim organizacijama Općinski načelnik vršit će u skladu sa utvrđenom namjenom .
 - b. **Sredstva Fonda prostornog uređenja raspoređena programom** trošit će se u skladu sa planom programa a isti je sastavni dio budžeta općine Trnovo za 2017.godinu.
 - c. **Sredstva za učešće u adaptaciji vjerskih objekata** koristiće se donošenjem Zaključka Općinskog načelnika.

Član 12.

- (1) Svaki utrošak sredstava Budžeta mora biti odobren od Načelnika ili lica kojeg Načelnik ovlasti.
- (2) O dinamici utroška budžetskih sredstava na osnovu planova i prijedloga korisnika iz člana 3. Budžeta odlučuje Općinski načelnik u skladu sa važećim propisima i ovom Odlukom.
- (3) Pomoćnici načelnika odgovorni su za potpunu i pravovremenu naplatu prihoda i primitaka iz svoje nadležnosti i dužni su provesti sve zakonom propisane radnje radi naplate potraživanja iz svoje nadležnosti.
- (4) Svaki rashod i izdatak mora se zasnivati na vjerodostojnoj knjigovodstvenoj ispravi i pratećoj dokumentaciji kojom se dokazuje zakonitost stvorene obaveze zaplaćanje.
- (5) Isplata sredstava putem blagajne Općine može se vršiti isključivo na način i za namjene utvrđene Upustvom o blagajničkom poslovanju.

Član 13.

Pogrešno ili više uplaćeni prihodi u tekućoj godini u Budžetu vraćaju se uplatiteljima na teret tih prihoda, a na osnovu rješenja Općinskog načelnika po podnesenom zahtjevu uplatitelja putem nadležne službe.

Član 14.

- (1) Hitni i nepredviđeni izdaci koji se pojave u toku budžetske godine podmiruju se iz sredstava tekuće rezerve utvrđene u Budžetu.
- (2) O raspodjeli tekuće rezerve odlučuje Općinski načelnik. Budžetsko izdvajanje za tekuću rezervu ne smije preći 3% ukupnih prihoda budžeta, isključujući primitke.
- (3) Općinski načelnik polugodišnje izvještava Općinsko vijeće o korištenju sredstava budžetske rezerve.

Član 15.

- (1) Reviziju Budžeta vrši Ured za reviziju Budžeta –proračuna u Federaciji Bosne i Hercegovine u skladu sa Zakonom
- (2) Nadzor nad izvršenjem Budžeta vrši nadležni državni organ za reviziju Ministarstva za finansije Kantona Sarajevo, a praćenje upotrebe sredstava Budžetskih korisnika vrši komisija koju imenuje Općinski načelnik u skladu sa Pravilnikom o internom nadzoru Budžeta općine Trnovo i budžetskih korisnika i komisija za Budžet i finansije Općinskog vijeća.

Član 16.

Na sva pitanja koja nisu regulisana ovom Odlukom, a tiču se izvršavanja, računovodstva, nadzora, revizije i finansijskog izvještavanja Budžeta primjenjivat će se odredbe važećih zakona.

IV KAZNENE ODREDBE

Član 17.

Odgovorno lice budžetskog korisnika, Općinski načelnik, kao i drugo lice odgovorno za Budžet Općine kaznit će se za kršenje odredbi ove Odluke saglasno sa odredbama čl.102. čl. 103. Zakona o budžetima u Federaciji Bosne i Hercegovine.

III TRANSPARENTNOST

Član 18.

- (1) Budžet se donosi i izvršava u skladu sa principima transparentnosti.
- (2) Dokument okvirnog Budžeta iz člana 14. Zakona, Budžet, Odluka o izvršavanju budžeta kao i svaka izmjena i dopuna budžeta općine Trnovo, objavljuju se u Službenim novinama Kantona u roku od deset dana od dana njihovog donošenja.
- (3) Tromjesečni, polugodišnji i godišnji izvještaji o izvršenju budžeta objavljuju se u Službenim novinama Kantona u roku od deset dana od dana njihovog donošenja.

IV PRELAZNE I ZAVRŠNE ODREDBE

Član 19.

Za obavljanje platnog prometa po računu Budžeta, Općinski načelnik zaključuje ugovor sa ovlaštenim poslovnim bankama.

Član 20.

Ova Odluka stupa danom objavljivanja u „Službenim novinama Kantona Sarajevo“, a primjenjivat će se za fiskalnu 2017.god.

Broj: 01-02-534
Trnovo, 15.02.2017

